

BARAZA LA WAWAKILISHI ZANZIBAR

Simu Nam. + 255 24 2230602/1

Fax Nam. + 255 24 2230215

Tovuti: www.zanzibarassembly.go.tz



SANDUKU LA BARUA 902,
ZANZIBAR

Barua Pepe: zahore@zanlink.com

HOTUBA YA KAMATI YA FEDHA, BIASHARA NA KILIMO KUHUSU RIPOTI YA UTEKELEZAJI WA MAAGIZO YA KAMATI KWA WIZARA YA BIASHARA, VIWANDA NA MASOKO YANAYOTOKANA NA RIPOTI YA KAMATI YA MWAKA WA FEDHA 2016/2017

Mheshimiwa Spika,

Nianze Hotuba yangu hii kwa kumshukuru mwenyezi Mungu Mtukufu kwa kutujaalia uzima na afya njema na kutuwezesha kukutana leo hii ndani ya Baraza lako tukufu kwa min-ajil ya kuendelea na majukumu yetu ya uwakilishi wa Wananchi katika chombo hichi adhimu cha kutunga sheria nchini.

Mheshimiwa Spika,

Nakushukuru wewe binafsi kwa kunipatia fursa hii ya kuwasilisha hotuba ya Kamati ya Fedha, Biashara na Kilimo kuhusu utekelezaji wa maagizo ya Kamati kwa Wizara ya Biashara, Viwanda na Masoko yaliyotokana na ripoti yetu iliyowasilshwa ndani ya Baraza hili katika mkutano wa tano uliofanyika mwezi Febuari, 2017.

Mheshimiwa Spika,

Kwa moyo mkunjufu kabisa tunampongeza Rais wa Zanzibar na Mwenyekiti wa Baraza la Mapinduzi Dk. Ali Mohammed Shein kwa kuiongoza vyema nchi yetu na kudumisha amani, utulivu na upendo tokea aliposhika wadhifa huo baada ya ushindi wa kishindo kwenye uchaguzi wa marudio wa mwezi Machi 2016 hadi leo. Tunamuomba Mola mtukufu amzidishie hekima na busara na ampe maisha marefu ili tuzidi kupata fursa ya kunufaika na busara zake.

Mheshimiwa Spika,

Nachukua fursa hii kumpongeza Mheshimiwa Makamu wa Pili wa Rais wa Zanzibar Balozi Seif Ali Iddi kwa namna anavyomsaidia Mheshimiwa Rais kutekeleza shughuli mbalimbali za umma na kusimamia vyema utekelezaji wa shughuli za Serikali.

Mheshimiwa Spika,

Shukurani za dhati ziende kwa Wizara ya Biashara, Viwanda na Masoko kwa kuanzia na Mhe. Waziri Balozi Amina Salum Ali, na watendaji wake wote kwa kutupatia majibu fasaha kwa maagizo ya Kamati pamoja na majibu mazuri wakati Kamati inapohitaji kupatiwa ufafanuzi wa mambo mbalimbali. Aidha, tunampongeza Katibu mkuu mpya Ndugu Juma Ali Juma na naibu Katibu Mkuu ndugu Ali Khamis Juma, Katibu Mtendaji wa Baraza la Taifa la Biashara Ndg. Bakari Haji Bakari, Mkurugenzi Idara ya Uendeshaji na Utumishi Ndg. Moh'd Jaffar Jumanne, na Ndg. Khamis Ahmada Shauri kuwa Mkurugenzi wa Idara ya Biashara kwa kuteuliwa kwao na Mheshimiwa Rais kushika nafasi hizo katika Wizara hii ya Biashara, Viwanda na Masoko.

Mheshimiwa Spika,

Kamati ya fedha, Biashara na Kilimo ina jumla ya Wajumbe saba na Makatibu wawili ambao kwa pamoja wameteteleza jukumu hili la kikanuni la kufuatilia utekelezaji wa maoni na maagizo ya Kamati kwa Wizara hii. Wahenga walisema “mcheza kwao hutunzwa”, sina budi kuwatunza Wajumbe hao kwa kazi nzuri waliyoifanya inayodhihirisha nyoyo zao za kizalendo walizonazo. Napenda muwatambue Wajumbe hao kwa majina kama ifuatavyo:

- | | | |
|------------------------------|---|-------------------|
| 1. Mhe. Yussuf Hassan Iddi | - | Mwenyekiti |
| 2. Mhe. Hamida Abdalla Issa | - | Makamu Mwenyekiti |
| 3. Mhe. Hamad Abdalla Rashid | - | Mjumbe |
| 4. Mhe. Ussi Yahya Haji | - | Mjumbe |
| 5. Mhe. Bihindi Hamad Khamis | - | Mjumbe |
| 6. Mhe. Mohammed Mgaza Jecha | - | Mjumbe |

- | | | |
|------------------------------|---|--------|
| 7. Mhe. Ali Salum Haji | - | Mjumbe |
| 8. Ndg. Said Khamis Ramadhan | - | Katibu |
| 9. Ndg. Asma Ali Kassim | - | Katibu |

Mheshimiwa Spika,

Kwa kuanzia na utekelezaji wa agizo la kuwawezesha Wajasiriamali, Kamati iliarifiwa kuwa kwa sasa suala hili linasimamiwa na Taasisi mbalimbali zikiwemo Wizara ya Kazi, Uwezesaji, Vijana, Wanawake na Watoto, Wizara ya Biashara, Viwanda na Masoko na Wizara ya Kilimo, Maliasili, Mifugo na Uvuvi na hivyo kupelekea mgongano baina ya taasisi hizo. Hivyo, Kamati inashauri mipango ya uratibu wa uwezesaji wananchi iliyoandaliwa kwa pamoja na Wizara zote hizi kufanywa kwa haraka ili kuzitumia rasilimali chache zilizopo kwa kuwanufaisha Wajasiriamali wengi zaidi.

Mheshimiwa Spika,

Kamati yetu inatoa pongezi za dhati kwa Wizara ya Biashara, Viwanda na Masoko kwa kuratibu matamasha na maonyesho mbali mbali nchini, kwa nia ya kuwatangaza na kuwapatia soko Wajasiriamali wadogo wadogo, ikiwa ni utekelezaji wa agizo la kuwapatia masoko Wajasiriamali hao. Aidha, Kamati inashauri Wizara itoe ratiba ya mwaka mzima ya matamasha mbalimbali yanayofanyika hapa nchini na kusisitiza haja ya kuwapatia Wajasiriamali hao utaalamu na vifaa kwa ajili ya kusarifu vizuri bidhaa zao ili kumudu ushindani wa kibiashara.

Mheshimiwa Spika,

Katika utekelezaji wa agizo la kuyadhibiti mafuta ya makonyo, Wizara inaendelea na utafiti ili kuwabaini wanunuzi wasio waaminifu wanaoanunua mafuta hayo kwa wingi na kuyauza nje ya nchi kwa faida kubwa kinyume na taratibu. Ili kuziba mianya ya uchakachaji wa mafuta hayo ya makonyo, Kamati ya Fedha, Biashara na Kilimo inaisisitiza Wizara kuhakikisha inalinda rasilimali zote zinazotokana na karafuu kwa kuziua wenyewe kwenye soko la nje. Aidha, Kamati inasisitiza haja ya kufanyiwa matengenezo makubwa kiwanda hicho au kuanzisha kiwanda kipya cha makonyo

kitakachotumia teknolojia ya leo pindi hali ikiruhusu, ili kukabiliana na tatizo la uchakavu wa mashine na kushindwa kukidhi mahitaji ya wateja wa nje kutokana na uzalishaji mdogo.

Mheshimiwa Spika,

Kamati inaipongeza Wizara kupitia shirika la Taifa la Biashara (ZSTC) kwa kutekeleza ipasavyo agizo la kuandaa mipango madhubuti ya kuendeleza kilimo cha viungo (spices) kwa wakulima wetu hapa Zanzibar kwani imebainika kuwa bidhaa hizo zina soko kubwa duniani. Pia, Kamati inaiomba Wizara kuzidi kuwapatia ushirikiano wakulima hao kwa kuwapatia anuani za wateja wa nje wanaohitaji bidhaa za viungo. Hatua hii ni muhimu kwa kukuza jina la Zanzibar kwenye soko la dunia na kukuza pato la wakulima na Taifa kwa ujumla.

Mheshimiwa Spika,

Katika utekelezaji wa agizo la kukabiliana na upungufu wa wataalamu unaoikabili Taasisi ya Viwango Zanzibar (ZBS), Kamati iliarifiwa kwamba Wafanyakazi kumi tayari wameshaajiriwa ambao wote wana kiwango cha shahada ya kwanza katika fani tofauti. Tunaipongeza Wizara kwa utekelezaji wa agizo hili kikamilifu. Aidha, Kamati inashauri kuwaendeleza wafanyakazi hao kitaaluma kwa kuwapatia mafunzo ya vitendo ili kupata ujuzi wa kuendesha shughuli za maabara.

Pia, Kamati inaishauri Wizara ya Biashara, Viwanda na Masoko iwe na mikakati ya muda mfupi na ya muda mrefu ya kuijengea uwezo wa kitaalamu taasisi ya Viwango ya Zanzibar (ZBS) ili kazi za ukaguzi wa bidhaa waweze kuzitekeleza wenyewe kwa ufanisi mkubwa.

Mheshimiwa Spika,

Mwisho kabisa, tunatoa shukurani kwa Wajumbe wote wa Baraza lako tukufu kwa kunisikiliza kwa makini wakati nikiwasilisha hotuba hii. Ni imani yetu kwamba michango yenu itasaidia katika kujenga zaidi utendaji wa Wizara hii. Kujumla, Kamati ya Fedha, Biashara na Kilimo inaipongeza Wizara ya Biashara, Viwanda na Masoko kwa

kuyatekeleza maoni na maagizo ya Kamati kwa kiwango kikubwa na Kamati imeridhishwa sana na majibu ya hoja hizo.

Mheshimiwa Spika,

Kwa heshima na taadhima naomba kuwasilisha.

Ahsante sana,

.....,

Yussuf Hassan Iddi,

Mwenyekiti

Kamati ya Kudumu ya Fedha, Biashara na Kilimo,

Baraza la Wawakilishi,

Zanzibar.